



XOSÉ ANTÓN PARADA FERNANDEZ, Concelleiro do Grupo Municipal do BLOQUE NACIONALISTA GALEGO (BNG), neste Concello, presenta a seguinte **Proposición** ante o Pleno da Corporación Municipal **PARA DECLARAR O 24 DE FEBREIRO DÍA DE ROSALÍA E PARA REALIZAR ACTIVIDADES QUE PROMOVAN O COÑECEMENTO DA SÚA OBRA E DO SEU COMPROMISO VITAL**

EXPOSICION DE MOTIVOS

Rosalía de Castro é a escritora máis representativa da lingua e da literatura galegas. A publicación do seu libro *Cantares Gallegos*, o primeiro escrito integramente no noso idioma, desde a vontade firme e inequívoca do seu significado, sinala o inicio da restauración do uso escrito do noso idioma e o final de séculos de silencio e esquecemento. A recuperación literaria e lingüística da Galiza ten unha enorme débeda coa súa obra, que marca a ruptura da marxinalidade do galego e desafia a sociedade do seu tempo a través dun discurso comprometida coa súa terra, coas súas xentes e coa súa lingua.

A súa obra é un retrato do pobo galego e goza dunha total actualidade. Desde o século XIX Rosalía de Castro foi homenaxeada polas galegas e os galegos como poeta nacional, pois reclamou a redención da patria galega e asumiu a voz do seu pobo, unha voz que guiou permanentemente a súa obra e o seu pensamento. Esta galegitude intrínseca dos seus textos, esta comunicación e entendemento permanente co seu pobo, ao se dirixir a el no seu idioma propio, foi o que a fixo tamén poeta de todos os pobos, chegando a formar parte da nómina de escritoras e escritores máis destacadas/os da literatura universal de todos os tempos. Por outra parte, existen novas lecturas e novos descubrimentos quer a respecto do conxunto da súa obra quer sobre a propia figura da nosa autora e o seu papel socio-histórico que paga a peña coñecer e difundir. E houbo, asemade, nos últimos tempos, unha importante reactualización da súa obra que volveu ser actualizada a través de diferentes formatos e expresións culturais (música, teatro, literatura, danza...).

Por todos estes motivos, a difusión do coñecemento da súa obra é necesaria para as galegas e os galegos, en especial para as xeracións máis novas que colectivamente contribuímos a coeducar, sendo a súa palabra feita poesía ou prosa reflexiva un dos procedementos máis eficaces para fomentar o amor á nosa lingua e comprender a nosa identidade cultural.

De maneira inexplicábel, a Consellaría de Cultura non recolle, para o ano 2014, o 24 de febreiro como Día de Rosalía no seu Calendario do Libro e da Lectura, como viña sendo habitual, un feito que queremos denunciar e que só

SR. ALCALDE PRESIDENTE DO CONCELLO DE RIBEIRA



se pode enmarcar no intento de ocultar a figura dunha Rosalía viva, radical, culta e comprometida que hoxe grandes sectores da poboación coñecen e admiran.

Por todo isto, e seguindo as directrices dunha convocatoria xa consolidada pola Asociación de Escritores e Escritoras en Lingua Galega (AELG), propoñemos ao Pleno Municipal deste concello a adopción dos seguintes

ACORDOS:

- **Declarar o 24 de febreiro Día de Rosalía no noso concello.**
- **Solicitar da Xunta de Galiza que recupere a incorporación do Día de Rosalía ao seu Calendario do Libro e da Lectura.**
- **Emprender e apoiar a realización de actividades de promoción da obra da nosa escritora que impliquen o conxunto dos veciños e veciñas do noso concello o 24 de febreiro. Entre estas actividades, estarán as de pendurar nos balcóns das casas e das institucións bandeiras galegas, pancartas con versos de Rosalía debuxados, procurar espazos para realizar graffitis, murais...**
- **Realizar unha lectura pública da obra rosaliana nun lugar destacado do concello en que o alumnado dos centros escolares e persoas destacadas pola súa actividade cultural teñan o papel protagonista.**
- **Desenvolver unha serie de actividades para promover o coñecemento de actualizacións da obra rosaliana a través da música, o teatro, a literatura ou a danza, así como seminarios, mesas redondas e/ou conferencias sobre a súa obra e figura.**

Ribeira, 14 de xaneiro de 2014

Asdo.: Xosé Antón Parada